

**Teks Ucapan sempena Majlis Sambutan Maál Hijrah Tahun  
1443H/2021M**

By : YAB TAN SRI DATO' HAJI MUHYIDDIN BIN HAJI MOHD  
YASSIN

Date : 09/08/2021

---

**TEKS UCAPAN  
YAB TAN SRI DATO' HAJI MUHYIDDIN BIN HJ. MOHD.  
YASSIN  
PERDANA MENTERI**

**SEMPENA**

**MAJLIS SAMBUTAN MA'AL HIJRAH  
TAHUN 1443H/2021M**

**PADA**

**9 OGOS 2021 (ISNIN)  
BERSAMAAN 30 ZULHIJJAHH 1443 HIJRAH**

**BERTEMPAT DI  
MASJID TUANKU MIZAN ZAINAL ABIDIN (MTMZA)  
PUTRAJAYA**

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ وَالصَّلَاةُ وَالسَّلَامُ عَلَى أَشْرَفِ الْأَنْبِيَاءِ وَالْمُرْسَلِينَ وَعَلَى آلِهِ وَأَصْحَابِهِ أَجْمَعِينَ

Yang Amat Berhormat Dato' Sri Ismail Sabri bin Yaakob  
Timbalan Perdana Menteri

Yang Berhormat Senator Datuk Dr. Zulkilfi Bin Mohamad Al-Bakri  
Menteri di Jabatan Perdana Menteri (Hal Ehwal Agama) Merangkap  
Pengerusi Jawatankuasa Induk majlis Sambutan Ma'al Hijrah Peringkat  
Kebangsaan Tahun 143 Hijrah/ 2021 Masehi

Yang Berhormat Ahli-Ahli Jemaah Menteri, Yang Berbahagia Ketua  
Setiausaha Negara

Yang Berbahagia Tan Sri-Tan Sri, Datuk Seri – Datuk Seri, Dato' – Dato',  
Tuan-tuan, Puan-Puan Hadirin dan hadirat Sekalian

Assalamualaikum warahmatullahi wabarakatuh,

1. Terlebih dahulu patik dengan penuh hormat dan takzimnya, merafak sembah menjunjung setinggi-tinggi kasih di atas limpah perkenan Kebawah Duli Yang Maha Mulia Seri Paduka Baginda Yang Di-Pertuan Agong, Al-Sultan Abdullah Ri'ayatuddin Al-Mustafa Billah Shah ibni Almarhum Sultan Haji Ahmad Shah Al-Musta'in Billah sudi menyempurnakan titah khas Sambutan Maal Hijrah Peringkat Kebangsaan Tahun 1443 Hijri secara maya pada petang yang penuh barakah ini.

2. Titah nasihat dan pedoman yang akan disempurnakan oleh Kebawah Duli Yang Maha Mulia Tuanku selaku ketua agama Islam Negara ini, sudah tentunya akan menyuntik aspirasi dan iltizam bagi diri Patik sekalian serta rakyat keseluruhannya bersempena dengan kedatangan tahun baharu Islam, 1 Muharram 1433 Hijri ini.

3. Sesungguhnya, patik dan seluruh rakyat sekalian akan terus menunjukkan taat setia dan kasih sayang kepada Kebawah Duli Yang Maha Mulia Tuanku dan akan senantiasa berdoa ke hadrat Allah SWT, moga – moga Kebawah Duli Yang Maha Mulia Tuanku dan Kebawah Duli Yang Maha Mulia Seri Paduka Baginda Raja Permaisuri Agong Tunku Hajah Azizah Aminah Maimunah Iskandariah binti Almarhum Al-Mutawakkil Alallah Sultan Iskandar dilanjutkan usia dan berada dalam keadaan sihat untuk terus memayungi pemerintahan negara ini.

Menjunjung kasih Tuanku.

Saudara dan saudari yang saya kasihi sekalian,

4. Alhamdulillah, setinggi-tinggi kesyukuran dipanjatkan ke hadrat Allah Subhanu Wa Taala kerana dengan limpah kurnia dan izin-Nya jua, kita dapat meraikan majlis sambutan Ma'al Hijrah yang bertemakan “Manhaj Rabbani Ummah Berkualiti”, pada petang yang berbahagia ini.

5. Saya berdoa ke hadrat Allah Subhana Wa Taala mudah-mudahan sambutan ini sedikit sebanyak dapat terus dihayati dan disemarakkan oleh umat Islam di negara ini walaupun kita semua masih berjuang untuk menamatkan pandemik COVID-19.

6. Majlis pada petang ini adalah cerminan iltizam Kerajaan agar syiar Islam terus terpelihara dan dimartabatkan sejajar dengan kedudukannya sebagai Agama Persekutuan yang dijunjung tinggi.

7. Saya menyeru kepada diri saya dan saudara saudari sekalian, marilah bersama-sama kita menjiwai peristiwa Hijrah yang bukan sekadar mengenang perpindahan Nabi Muhammad Sallallahu Alaihi Wassalam secara fizikal, dengan meninggalkan harta dan kediaman semata-mata.

8. Saban tahun, peristiwa Hijrah ini memperteguh tekad kita untuk berusaha bersungguh-sungguh dalam mengamalkan ajaran Nabi Sallallahu Alaihi Wassalam, melakukan perubahan sikap dan tindakan kita kepada sifat-sifat mahmudah dan lebih baik sebagaimana dianjurkan Baginda Sallallahu Aalaihi Wassalam.

9. Saya doakan dengan kedatangan tahun baharu Islam ini, Allah Subhana Wa Taala akan mengurniakan ke atas kita semua khususnya umat Islam

keimanan dan kesabaran untuk meneruskan ikhtiar kita menerusi Pelan Pemulihan Negara atau PPN yang sedang giat dilaksanakan pihak Kerajaan dengan dokongan saudara dan saudari sekalian, insyaaAllah.

10. Saya juga berdoa agar ujian ini berupaya menjadikan kita umat Islam yang lebih bertakwa dan mempunyai ketahanan jiwa serta asertif diri yang padu. Firman Allah Subhanahu wa Taala menerusi ayat 186 dalam surah Ali-Imran:

Yang bermaksud "Demi sesungguhnya, kamu akan diuji pada harta benda dan diri kamu. Dan demi sesungguhnya, kamu akan mendengar dari orang-orang yang telah diberikan Kitab dahulu daripada kamu dan orang-orang musyrik: banyak (tuduhan-tuduhan dan cacian) yang menyakitkan hati. Dalam pada itu, jika kamu bersabar dan bertakwa maka sesungguhnya yang demikian itu adalah dari perkara-perkara yang dikehendaki diambil berat (melakukannya)."

Saudara dan saudari yang saya kasihi sekalian,

11. Saya berharap agar seluruh umat Islam dan rakyat akan bersama-sama menghayati tema sambutan pada tahun ini. Marilah kita memperbetulkan niat, tekad dan usaha kita untuk memperbaiki diri dan amalan dalam kehidupan seharian. Ini bersesuaian dengan semangat Hijrah dan

mencapai hasrat “Ummah Berkualiti” yang menjadi matlamat kita semua, insyaaAllah.

12. Mengakhiri bicara ini, saya mengucapkan selamat menyambut Tahun Baru Hijrah kepada seluruh umat Islam serta rakyat Malaysia, juga setinggi-tinggi tahniah dan penghargaan kepada semua pihak yang terlibat dalam menjayakan Majlis Sambutan Ma‘al Hijrah Peringkat Kebangsaan Tahun 1443 Hijri bersamaan 2021 Masihi.

13. Semoga semua usaha murni ini akan mendapat kerediaan Allah Subhanahu Wa Taala dan ganjaran yang setimpal daripada-Nya.

14. Sekian. Wabillahittaufiq wal hidayah, Wassalamualaikum warahmatullahi wabarakatuh.

**Copyright of the Prime Minister’s Office Official Website**

Source: <https://www.pmo.gov.my/2021/08/teks-ucapan-sempena-majlis-sambutan-maal-hijrah-tahun-1443h-2021m/>